

Date – 09/06/2025

Time - 7:30 -7:40Hrs

AKASHVANI AIZAWL

REGIONAL NEWS BULLETIN

HEADLINES (MORNING)

- 1 Prime Minister Narendra Modi kaihhruai sorkar kum 11 chhunga hmalakna hrang hrang zingah Mizoramah pawh inkalpawhna lama ram rotling tam tak siam a ni tawh.
2. Hortoki leh Sairang inkar rel kawng him tawh leh tawh loh endik chhunzawm mek a ni.
3. Assam-ah tuilian a kam hret hret chungin district 11 a cheng mi nuai 2 sing 5 chuangin tuilian hi an la tuar.
4. Prime Minister Narendra Modia chuan Viksit Bharat siam turin ramchhung hmeichhia ten theihtawpin tan an la tih a sawi.

<><><>

11 YEARS OF PM MODI’S GOVT. (INFRASTRUCTURE)

Prime Minister Narendra Modi kaihhruai sorkar kum 11 chhunga hmalakna hrang hrang zingah Mizoramah pawh inkalpawhna lama ram rotling tam tak siam a ni tawh.

Mizoram chhungah National Highway kawngpui kilometre 1,000 chuang sial a ni tawh a, chu'ng zingah chuan National Highway Infrastructure Development Corporation Limited (NHIDCL)-in kilometre 620 chu an zo fel tawh a. Kum 4 kal ta chhung chauh pawh khan km 620 a thui kawng siamna atan hian NHIDCL hian cheng vaibelchhe 13,000 zet an seng a. Hei bakah hian NHIDCL-in hna an thawh chhunzawm zelna turin cheng vaibelchhe 6,400 chu tihfel a ni leh tawh a, hna hi tan thuai tura ruahman a ni. Hna lian tham leh pawimawh thawh tawh zinga langsar zualte chu Aizawl leh Tuipang inkar kawngpui leh Seling leh Champhai inkar kawngpui a ni a. He'ng kawngpui siamte hian thenawm ram Myanmar leh Bangladesh bakah thenawm state Assam, Tripura leh Manipur te nena inkalpawhna a tichangtlung a, zin veivakmite tana awlsamna a nih rualin insumdown tawnna kawngah pawh a thawh hlawk dawn a ni.

Mizoram BJP unit hruiatu zing ami, state executive member leh Aizawl district vice president ni bawh Pi K. Vanlalruati chuan Aizawl pumpelh (bypass) kawngpui pahnih - khawchhak lam leh khawthlang lama siam hna buaipui mek a nih thu a sawi a. Aizawl pumpelh atana khawchhak lama km 34 leh metre 500 kawngpui siam hna hi Bharatmala Pariyojana ruahmanna hnuaiah cheng vbc 2,300 ruahmanin NHIDCL in an thawk tan mek a, he kawngpui-ah hian lei verh km 2 leh a chanve zeta thui a awm dawn a ni a ti a. Khawthlang lama Aizawl pumpelh km 45 a thui kawngpui siam hna hi PM-DevINE hnuaiah cheng vbc 500 sengin Mizoram PWD-in an thawk a ni. He'ng kawngpui pahnihte hi kum 2028 khian mipui hman tangkai tura zawh fel hman tum a nih thu Pi K. Vanlalruati chuan a sawi.

Kawngpui bakah hian kum 2014-a NDA sorkar a lo din hnu khan rel kawng tihchangtlun a siam belh hna hi nasa taka thawh a nih thu BJP hruiatu chuan a sawi a. Kum 2016 khan rel kawng lian chi-in a vawi khatna atan Bairabi a rawn lut a. Tunah hian India-in zalenna a hmuh hnu-a a vawi khatna atan Aizawl chu rel kawngin a chhun ve dawn ta ni a sawi-in Mizoram khawpui ber rel lian chi-in a thleng tur hi hmasawna ropui tak a ni a ti.

<><><>

11 YEARS OF PM MODI’S GOVT. (HEALTH)

Sorkar laipui Ministry of Health & Family Welfare sum hmanga Regional Institute of Para-medical & Nursing Sciences (RIPANS) behchhana damdawi-in sak chu a in sak zawh tawh a ni.

Prime Minister Pu Narendra Modi sorkar kum 11 chhunga Mizoram chhunga hmasawna hna thawh pawimawh tling pha RIPANS hmuna khum 100 chuang awmna tur damdawi-in sak hi a in ruangam sak zawh tawh a ni a. A chhung chei chhoh mek a nih bakah damdawi-ina awm tur khawl leh bungrua chi hrang hrangte lei mek a nih thu RIPANS a faculty member Dr. H. Lalrinmawia chuan a sawi a. RIPANS Hospital-ah hian damlo khum pangngai bakah khum damlo na zualte dahna tur bik khum 5 awmna Intensive Care Unit (ICU) a awm dawn a. Khum pathum awmna trauma care leh khum tho awmna triage

observation awm tura ruahman bakah khum pasarih awmna nau neihna ward-te leh khum pali awmna a hranga damlo dahna isolation ward te nen chuan a vaiin khum 121 a awm dawn niin Dr H. Lalrinmawia chuan a sawi a ni.

RIPANS hi Aizawl hmar lam Zemabawk a nursing, pharmacy, leh paramedical chi hrang hrang zir theihna a ni a. India hmarchhak a hetiang zirna awm chhun a nih avangin hmarchhak state hrang hrang atangin zirlai an rawn kal a ni.

Hriselna lam hmasawnna atana Prime Minister Narendra Modi sorkar hnathawh tam tak zingah Mizoramah Ayushman Bharat hmang tangkaitu mi nuai 5, sing 1 leh sang 7 an awm mek a. Mi rethei zawkte'n an dam loha cheng nuai nga thleng man chawi lova kum khat chhunga an inenkawl theihna tura ruahman Ayushman Bharat PM-JAY hi Mizoram mipui-in an hmang tangkai hle a ni. Hei bakah hian damdawi man tlawm taka lei theihna Jan Aushadhi Kendra dawr 15 hawn a ni tawh bawk a. Medical college pawh sorkar laipui tanpuina a din a ni tawh bawk a ni.

<><><>

NEP 2020

National Education Policy (NEP) 2020 chu Mizoram University-ah kalpui chho tan mek a nih avangin zir dan kalphung pawh nasa taka thlak danglam mek a ni.

NEP 2020 in a tum ber pakhat chu thil chhui bing (research oriented) taka zirlaite kalpui a tum a ni a. Kum danga an lo kalpui thin dan a bik takin theory paper chu nasa takin tihtlem a ni tawh a, chumi ai-ah chuan a taka thiltih chu zirlaite’n semester khatna, hnihna leh thumna-ah field work an kalpui a, dissertation hi Semester palina a thehluh turin Semester pahnihna atangin an tan chho a ni. Tunah chuan Zirtawpni hi zirlaite'n field work-a an kal theih na’na dah awl a ni tawh bawk.

Mizoram University a Political Science department a Assistant Professor Pu J.C. Zomuanthanga chuan Zirna ina inziahlul chungchangah NEP 2020 hian chuti danglamna a thlen luuk lo nia hriat a nih thu a sawi a, zirlai an pung tual tual tih sawiin Common University Entrance Test (CUET) hman a nih hnuah India ram hmun hrang hrang atangin leh foreign lam atang pawhin Mizoram University an rawn thlen theih phah a ni a ti.

<><><>

RAILWAY

Hortoki leh Sairang inkar rel kawng him tawh leh tawh loh a endik chhunzawm mek a ni a.

Northeast Frontier Railway (NFR)-a Mizoram awm chilhtu Deputy chief engineer (Construction) Pu Harjermal Meena-a’n Akashvani Aizawl a hrilh danin Zirtawpni atang khan Commissioner of Railway Safety (CRS) Pu Sumeet Singhal an Hortoki leh Sairang/Sihhmui rel chawlhmun inkara rel kawng siam zawh tawh chu a him leh him loh a endik tan a. Ngawrh takin a thawhpuite nen endik hna hi an thawk chhunzawm zel a. Naktuk khian rel kawng him leh him loh endik hna hi zawh fel theih beisei a ni. Endik hna zawh fel a nih hnu, a him ngei e tih a fiah a, chu chu Ministry of Railways thuneitu sangte hnena thehluh a nih hunah rel hi Bairabi atanga Sairang/Sihhmui thlengin a tlan thei tawh dawn a. July thla tawp lamah hawn theih beisei a ni.

Hemi hma hian Pu Sumeet Singhal hian Bairabi leh Hortoki inkar rel kawng hi nikum July thla chawhnu lam khan a him leh him loh endik tawhin August thla khan a him tawh tih a fiahna a thehluh tawh a. Tuna a endik hi hemi kawng km 51 chuang endik hna a zawhna tur a nih thu NFR-a chief public relation officer (CPRO) Pu Kapinjal Kishore Sharma chuan a lo sawi tawh a ni.

Hetih lai hian kar kalta Nilaini khan rel bungraw phur tlan chak theih zawng tur enchhin a lo ni tawh a. Hemi ni hian darkar khata km 35 leh 50 a chak a tlantir chhin a ni a. Darkar khata km 110 tlantir chhin erawh chu ti rih lovin Thawhlelni hian tlantir chhin leh tum a nih thu Pu Harjermal Meena chuan a sawi a ni.

<><><>

AWARD

India Meteorological Department (IMD) a meteorology Director general Dr. Mrutyunjay Mohapatra chuan 'United Nations Sasakawa Award 2025 for Disaster Risk Reduction' chawimawina sang a dawn thu Mizoram State Meteorological Centre, IMD-a director Pu Sudheer Kumar Dwivedi chuan Akashvani Aizawl a hrilh.

Pu Sudheer Kumar Dwivedi chuan he chawimawina hi ram pum tana chhuanawm a nih bakah khuarel chhiatna lo thleng tur inhrilh lawkna leh chhiatna lo thleng tur atana lo inpuahchah lawkna kawnga India ram hma a sawn nasatzia chiang taka tarlangtu a nih thu a sawi. Kum 1986-a Nippon Foundation sum thawh hmanga siam tan UN Sasakawa Award hi khawvel pum huapa chhiatna thleng tur inven lawkna atana thawh hlawkte chawimawina a ni a. Chhiatna laka invenna atana thawk tha mimal leh pawl hrang hrang hnena hlan thin a ni. He chawimawina sang dawngtu Dr. Mrutyunjay Mohapatra hi “Cyclone Man of India” ti hial a hriat lar a nih thu Pu Dwivedi chuan a sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



ASSAM

Assam-ah tuilian a kam hret hret a. Hetihlai hian district 11 a cheng mi nuai 2 sing 5 chuangin tuilian hi an la tuar a. Thingtlang khua 740 chu tuiin a la chim a ni. Nimin khan Kamrup-ah tuilian avanga chhiatna thlengah mi pathum an thi leh a ni.

State sawrkar chuan ngawrh takin chhanchhuah hna a thawk mek zel a. Assam State Disaster Management Authority sawidanin relief camp 130 ah mi sing 2 leh sang 5 an khawsa mek a. Tun dinhmunah lui chim chin hlauhawma awm an awm rih lo a ni .

(Newsonair)



NDA 11 YEARS

Prime Minister Narendra Modia chuan Viksit Bharat siam turin ramchhung hmeichhia ten theihtawpin tan an la tih a sawi. Nimina NDA kum 11 tlin puala social media-a a thu dahah Pu Modia chuan hmeichhiate kaihhruainaa hmasawнна hrang hrang a tarlang a. NDA sawrkar chuan hmeichhiate hmahruaina hnuaia hmasawнна kalpui awmzia a tihchian thu a sawi a. Hmalakna chhinchhiahtlak tak tak neih anih thu sawiin chung zinga langsarte chu Swacha Bharat Abhiyan, Jan Dhan account te leh a bulthut atanga hmeichhiate dinhmun chawikante anih thu a sawi. Pu Modia chuan Ujjwala Yojana chu choka thianghlim neihna tura mellung pawimawh tak anih thu sawiin MUDRA loan hmangin hmeichhe tamtakin mahni kutkawih ngeiin sum an thawkchhuak mek a ni a ti bawk a. PM Awas Yojana hnuaiah hmeichhiate tan chenna in tha leh him pek a ni a ti bawk.

(Newsonair)



EAM

External Affairs Minister Dr.S. Jaishankar-a chuan ni 7 thangin France, European Union leh Belgium a tlawh dawn. Pu Jaishankara chuan kawng hrang hranga India nena an thawhdunna ti nghet turin heng ramte hi a tlawh dawn a. France a cham chhungin External Affairs Minister hian Minister hrang hrangte a be dawn a. Heng Heng zingah hian Minister for Europe and Foreign Affairs of France, Jean Noel Barrot a kawm dawn a. Tun thla ni 12 leh 13 a Mediterranean Raisina Dialogue ah a tel bawk ang..

(Newsonair)

